



نور الصباح







الشاعر
جابر ياقوت البنهاوي



الإهداء

إلى توأم روحي ..
إلى من شاركتني الحياة ..
حلوها ومرها ..
إلى من كانت أساسا ..
في رسم مستقبل اولادنا ..
إلى رفيقة العمر ..
إلى زوجتي الحبيبة ..
إلى اولادي الأعزاء ..

مجدى - طارق - ابنتى نهاد

أهدى هذا الديوان

المؤلف

جابر ياقوت البنهاوي

•

•

•

•

تقديم

بقلم الشاعر / محمد مكيوه

* الزجل خافل بالابداعات الانسانية على
مر العصور ومن رحم الزجل كانت القصائد
الزجلية المتنوعة بداية من الاندلس الى
عصرنا هذا .

* والزجل هو راحة الارواح وبهجة
المشتاق وصلاة العاشق ودعاء العابد وصوت
الراعى فى البادية وسيف العدالة ونشيد الجنود
حقا لقد امتعنا جيل الرواد من الناضحين فى كل
مكان وقدموا لنا الكثير من الازجال الذى
اصبحت تراث يعتد به وما زال هذا التراث
ينبض بالحياة حتى الآن وخلال هذه الفترة

ظهر فى ميدان الزجل أسماء جديرة بكل تقدير
واحترام منهم الاستاذ العميد / جابر ياقوت
البنهاوى صاحب هذ الديوان (نور الصباح).
* وجابر البنهاوى من الاسماء التى
تتألأ فى كافة المحافل الثقافية له أفانين عجيبة
تستحق الدرس ذوق رفيع فى الابداع الادبى
الذى يقدمه وهذا الديوان رغم صغر حجمه الا
أنه يجمع الكثير من الافكار البكر المتميزه
وايضاً بالديوان مجموعه من الرباعيات تذكرنا
بابن عروس وصلاح جاهين

* وديوان نور الصباح للشاعر جابر
البنهاوى جامع شامل فى موضوعاته الطريفه
ولنبدأ فى عرض بعض الافكار التى تناولها
الديوان .. يقول ..
عربيه ضربت ولد بيعدى فى الشارع

واللمه كترت عليه ولاحد بيسارع
يجيب له أسعاف تشيله وتنقله بسرعه
قبل المقدر ما يحصل ويموت فدى الشارع

كما يقول فى رباعية أخرى :

على البلاج شفت طفل وطفله ماسكين بعض
بيمشى بيها على الرمله وايدهم شابكة فى إيدى بعض
أنا قلت شوف آدم وحوا من بداية الخلق
أهو هما كانوا كده دلوقت يكرهوا بعض

* والحقيقه ان مجموعة الرباعيات التى
فى الديوان تستحق الاشاده بما فيها من صور
وأخيلة متميزة ومن النماذج التى توقفت أمامها
فى هذا الديوان قصيدة النفاق التى يقول :
الشاعر جابر البنهاوى فى بدايتها :

أنا مبدأى فى الحياه إننى ماطاطى لحد
وراسى مرفوعه دايمًا مهما كان الحد
ف الحق ما اعرف أخويا عنه ما اقدر احيد
مهما تكون النتيجة ومهما راح يحتد



* بساطه واقتناع ونظم جيد من جبر
البسيط تعود بنا الى بيرم العظيم وأبداعته ،
ونقلب الصفحات لتتوقف أمام هذه القصيده
عنوان الديوان [نور الصباح] يقول الشاعر
جابر البنهاوى فيها
شأشأت شمسك يا بلدى
نورت فوق البيوت
زقزق العصفور معها
قبل ما نهارتنا يفوت

والآذان ع المدنه كبر
صبح طالع يوم جديد
صحى كل الكون ونور
دى بداية يوم سعيد



* القصيده جميله وانسانيه تحكى عن اليوم
المشرق الجميل تداء من بحر الرمل حول
الحركه الصباحيه ، المؤذن ، الصانع ، التبايع
صوره تشييطيه من خلال قصيده جميله .
* ونجد ايضاً فى هذه المجموعه الممتازه
بعض القصائد من شعر التفصيله [الشعر الحر]
وأنا من أنصار التجديد ومن قصيدة أخرى من
ديوان [نور الصباح] نلتقى مع قصيدة البحر



البحر دا لعبتى طول عمرى أبحر فيه
من مشرقه لمغربيه وف مركبى أنا فيه
سواح وادور على مرسى ما أنا بلاقيه
والبحر دنيا وتلقى فيه مدن حواليه



الموج يشيل مركبى ويحطها تانى
على موجه تانيه وكله يبقى فى ثوانى
وتميل يمين أو شمال لما كده تدرفل
والرياح شديده بتلعب برضه من تانى



* القصيدة تأخذنا الى رحله بحريه جميله
فى انسياب ودقه والازجال فى ديوان " نور
الصباح " متنوعه من خلال موضوعات جديده
مثيره (كيف أنام ، العمر فات ،

الضمير ، سماحة الاديان ، رقم سبعة ،
ضربوا العراق ، الحبل)
* والى هنا يا عزيزى المتلقى أتوقف
لأتركك مع نور الصباح والشاعر العميد جابر
البنهاوى متعه الله بالصحه والعافيه ليعطى
أكثر وأكثر .

والله ولى التوفيق

محمد مكيوه

★

★

★

★

18

نور الصباح

شأشأت شمسيك يا بلدى
نورت فوق البيوت

زقزق العصفور معاهما
قبل ما نهارنا يفوت

☆☆☆☆☆

والآذان ع المدنة يـدن
صبح طالع يوم جديد

صحى كل الكون ونور
دى بداية يوم سعيد

☆☆☆☆☆

والهوا كان لسه صابح
نسمة كانت ناعمة حلوة

٤

والسحاب كان لونه فاتح

يجرى ورا بعضه فى نشوة

☆☆☆☆☆

والديوك عمالة تدن

صوتها مالى الصبح كله

٥

والأمل طاليل براسه

والعمل لازم يقوله

☆☆☆☆☆

يالله على شغلك يا عامل

قوم واصحى خف نومك

فوق واغسل يالله وشك

٦

وابتدى من بدرى يومك

☆☆☆☆☆

صلى للمولى وكبر

وأقرا آيات من كتابه

٧

يالله قول الله وأكبر

صلی وارکع فی رحابه

☆☆☆☆☆

وأنزل الشارع دا بدری

عن معادك كام دقيقة

بعدها تركب براحتك

هیه دی أحسن طريقة

☆☆☆☆☆

تبتدی شغلک براحة

بالهداوة تأدی عملك

تبقى كده انت بصراحة

تستحق كل أجرك

☆☆☆☆☆

عامل الجمهور كويس

دول حبايبك دول أخواتك

حل مشاكلهم بسرعة

ربنا ينور حياتك

☆☆ ۱۹ ☆

رباعیات

بصیت لموج البحر لقیته کله جای
ونصه رایح لکن الباقي کله جای
زی الحیاة تتجدد کل يوم عن يوم
لکن بقی این آدم لو راح هناك مش جای

☆ ☆ ☆ ☆ ☆

أنا كنت فاکر إن الخير موجود فی کل الناس
والخير طبعی والشر مش فی الناس
لکن بقی اللى شفته کله علمنی
إن البشر متقسمین فیہ فاضل وفیه خناس

☆ ☆ ☆ ☆ ☆

الميه صافيه وشفافه ومن غير لون
كده خلقها ربها هوه اللى خلق الكون
لكن بقى الانسان ده جه و عكرها
وخلى لونها غميق وساعات بمليون لون

☆☆☆☆☆

لمحت عصفور بيبنى عشه فوق شجرة
بقش ناعم كتير يحميها مالعفرة
مين قاله يعمل كده ومنين دا اتعلم
سبحانه هوه العظيم شوف بص دى القدرة

☆☆☆☆☆

أنا أحب لما أشرب القهوة يكون لها وش
ولما أقعد فى بيتى يكون قصاد الدش
وأحب صاحب يكون مخلص وقلبه نضيف
ويكون ضميرة نقى وحبه مش فى الوش

☆☆☆☆☆

☆ ☆ ☆ ☆ ☆

فيه ناس بترغى وتتكلم فى سيرة الناس
بالكذب والصدق من غير شعور ولا احساس
اصل النميمة دي داء ولا عمره يتغير
والدين بينهاننا عنها دي اصلها وسواس

☆☆☆☆☆

أنا كنت صياد وبحرى ما السمك ملىان
ساعة ما ارمى الشبك وافرد فى اى مكان
وارجع الم الشبك والقاء ملان بالخير
دا رزق مكتوب وربك رصده للانسان

☆☆☆☆☆

زمن العجايب دا وقته عدى والله فات
والمعجزات انتهت ولا باقى منها حاجات
دلوقت وقت العمل والجهد هوه يفيد
لاجن ببساعد ولا حتى كنز فيه الوفات

☆☆ ٢٢ ☆☆

طلع القمر فى الفضاء والاسم نايل سات
ومصر إعلامها ظهر عالدينيا هل وساد
والكل شاهد حضارتنا منشوره فى الدنيا
وقمرنا غطى على الاقمار وعدى وفات

☆☆☆☆☆

ضرب الهوى بشدته على ضلفة الشباك
وقمت من مطرحى مخضوض ابص هناك
لقيتها حبة هوا ولاحد كان جالنا
كانت رياح الخريف هبت على الشباك

☆☆☆☆☆

انا اصلى بتشانم لما اشوف قطه تكون سوده
وف يوم ١٣ من الشهر احبس نفسى فى الاوده
وان شفت يوم ميه فى نص كباية اقول نصها فاضى
وان يوم سمعت صوات تبقى ساعه سوده

☆☆☆☆☆

وف يوم ولاده البشر ينزل اكيد عريان
ويكسى نفسه فى حياته يلبس هدوم الوان
ويعمل اللى فى نفسه والمتعه دى مراده
واخر العمر ساعه الموت يروح عريان

☆☆☆☆☆

فمن كان له من الدنيا حظ
فمن كان له من الدنيا حظ
فمن كان له من الدنيا حظ
فمن كان له من الدنيا حظ

فمن كان له من الدنيا حظ
فمن كان له من الدنيا حظ
فمن كان له من الدنيا حظ
فمن كان له من الدنيا حظ

کلبتی لیزا



كان عندي كلبه جميلة اسمها ليزا
كان نوعها ألماني قصير نفسها عزيزة
كان وشها فيه علامة والعيون عسلى
ولونها بنى جميل ولكنها لذيذة
☆☆☆☆☆

ساعة ما أرجع لبيتي كل يوم عادى
أحب أضرب جرس أصحى بيه أولادى
وأقول سلاموا عليكم ما حد يسمعنى
وإن ردوا يبقى هاى وبس دا مرادى
☆☆☆☆☆

لكن بقى ساعة الجرس ما يدق جوه البيت
تلاقى ليزا بتجبرى لحد باب البيت
تقف على رجليها وتحى بهمه وروح
ناقصها تنطق ترحب بيه لجل ما جيت

☆ ☆ ☆ ☆ ☆

وإن رحت أنام على السرير ألاقى ليزا جاياالى
وقبل ما أحط جنبى ألاقى ليزا لازقالي
وف حضنى تدخل قوى وتنام بحنية
وأحس برضه بحنانها وهيه دايمالى

☆ ☆ ☆ ☆ ☆

هيه أنيسى فى وحدتى وأنا وسط أولادى
مونسانى قوى وبلعب شاغلانى
نفهم ذكية تعرف كل اللى أنا عايزه
ياخسارة راحت وماتت وأنا أصلى غير راضى

☆ ☆ ☆ ☆ ☆

مترو الأنفاق

مترو الأنفاق خلانى مشتاق
أرجع وأزوره مرة ومرة
حاجة مهولة مش معقولة
أما تشوفه جوه وبره
☆☆☆☆☆

تحت الأرض تلقاه طائر
يمشى ويجرى على كيف كيفه
اعظم قيمة وأحسن سيمة
تحت الأرض ما تلحق طيفه
☆☆☆☆☆

لوريسنا رئيس دولتنا
عمله ونس يبقى تمام
كده انصفنا وكبر صيتنا
أطلى حضارة مع الأيام
☆☆☆☆☆

تحت الأرض بيجرى بسرعة
كام مليون راكب جواه
خف الزحمة وبقى رحمة
كل الناس مرتاحة معاه
☆☆☆☆☆

أما بتزل فى محطاته
تلقى سلام كهرياء طالعة
مترو بيجرى تحت أخواته
أنواره فى الأنفاق والعة



وده بىروح على شبرا قوام
ودا عالجيزة وتحت النيل
ونضافة ولا فى الأحلام
وطريقه تحتانى طويل



ومحطاته تحفة وشيك

تصميمها عمله فنان

ذوق تركيبها والسراميك

وتناسق بجميع ألوان

☆☆☆☆☆

والتذكرة يشفطها الباب

دغرى وتدخل كده على طول

والتذكرة ترجع تانى

تخرج بيها وقت وصول

☆☆☆☆☆

والمتمرو دا أكبر إنجاز
ندخل بيه فى حضارة القرن
ريسننا مفكر ممتاز
فكره أصيل ممزوج بالفن
☆☆☆☆☆

كيف أنام

بعد نهاية يوم حافل ..
أدخل غرفة نومى لأنام ...
فأمدد جسدى فوق سريرى ..
يسرح فكرى أتأمل ...
كيف مضى يومى ..
ماذا فعلت هل أحسنت ...
ماذا أجدت ضميرى ينتصب أمامى ...
ليحاسب يسألنى ..
حصيلة يومى يصدر حكما ...
لا يعرف كيف يجامل ..
يأتى النوم حثيثا أغمض عينى فأنام ...

☆☆☆☆☆

لست بكاتب

أعرف باني لست بكاتب فكتبت ..
وأعلم أنني لست بقارئ فقرأت ..
أكتب إحساسي على ورق أبيض ...
يكتب قلبي ما أشعر ..
ينساب شريعا في أسطر ...
تعبير عما أدرك ...
في أعماقي بركان عارم ..
تتدفق مني الكلمات ...
تتقص وزنا تتقص معنى ..
لكن هذا نبضي يتدفق
ويصير سطوار ذا معنى ..
يفهم معناها من يفهم إحساسي ...

☆ ☆ ☆ ☆ ☆

العمر فات

أرمق وجهي في المرأة ..

أتأمل قسماتي .. أبحث عن أيام شبابي ...

ليس أمامي من أبحث ..

من هذا رجل أشيب ليس أنا ...

وجه يملؤه تجاعيد ..

وفم يخلو من الأسنان ...

أين أنا ؟

بل هو أنت وزمانك فات ..

بقي من العمر فئات ...

ومر زمان هذا ما بقي من الإنسان ..

☆☆☆☆☆

البحر



البحر دا لعبتي دول عمري أبحر فيه
من مشرقه لمغربه وف مركبتي أنا فيه
سواح وأدور على مرسى ما أنا بلاقيه
والبحر دنيا فيه مدن حواليه



والموج يشيل مركبى ويحطها تانى
على موجة ثانية وكله ببقى فى ثوانى
وتميل يمين أو شمال لما كده تدرقل
والرياح شديدة بتلعب برضه من تانى



ومركبى ماشية يسبقها كذا درفيل
من بوزها يغطس ويطلع برضه هيه تميل
منظر جميل والنوارس طيارة حوالينا
نرميلها عيش رح بتاكل حتى هيه تميل

☆☆☆☆☆

وتفضل المركب ماشية صبح وليل ونهار
بتكافح الموج وساعات تكون مع التيار
تمشى فى وسط البحر فى لياالى وهيه محتارة
ولا حتى تلمح فى ليلها حتى ضى فانار

☆☆☆☆☆

لكن بتمشى على البوصلة بتهديها
تعرف طريقها فى وسط الليل وتهديها
ولا بر قدامنا نشوفه حتى قول أسبوع
لكن بنوصل هدفنا فى ساعة تحدد فيها

☆☆☆☆☆

والبحر عايز رجال صابرين لكن شجعان
ولا يخافوا الخطر دول أصلهم جدعان
يتحملوا المصاعب لم يهابوا شئ
ويصولوا المراكب حتى بر أمان

☆☆☆☆☆

الضمير



الضمير دى هيه كلمة مش بتستعمل كثير
الضمير يحكم فعالنا ببقى ده هو الخفير
لو يغيب الدنيا تخرب والحياة تبقى سداح
لو تفكر أينه حيجرى لما ح يغيب الضمير



الضمير لما يغيب دغرى بيعشوا اللبن
يبقى زبدة يبقى مرته لما تغليه يتعجن
زودوه بمية بيضه قال تضافه بيعسوه
وانت تدفع فيه فلوسك بس مش ح يكون لبن



الضمير لما يغيب البيوت تنهار قوام
قللوا الأسمنت خطوا حديد رفيع والسلام

كثروا الرملة فى عمودها قللوا برضه السياخ
بعدها لسه بتسأل عن عمارتك ليه تنام
☆☆☆☆☆

والضمير لما يغيب فى القماش تلقاه يدوب
تلقى ألوانه بتهت بعد غسله قول يدوب
والقماش دايب مملع بعد لبسه ما تلاقيه
أفضل أدعى عاللى صانع واللى بسببه يدوب
☆☆☆☆☆

والضمير لما يغيب فى المجارى نقول كمان
بعدها أتأخدت رشاوى فى إستلامها من زمان
تطفح الميه علينا فى الشوارع تبقى طين
والمرض يسرى فى بدنا ما فى للصحة أمان
☆☆☆☆☆

والضمير لما يغيب فى الغدا رح يفسدوه
غيروا التاريخ عليه يعنى برضه قدموه
خلو إنسان يبقى ياكل أكل كلب معلبات
شالوا صورة الكلب منه لأبن آدم أكلوه

☆☆☆☆

سماحة الأديان

مسلم مسيحي طول عمرى ما فكرت ايه يعنى
هو اخويا وانا أخوه ولافيه خلاف يعنى
عاشين مع بعض زى السمن جوه العسل
ولافيه خلاف أو شقاق والحب يجمعنى

☆☆☆☆

أمريكا بصت لقتنا إن احنا أخوات
جه فكرها فى مؤامرة تجعل فريقنا شتات
قالت القبط كلهم فى مصر مطهدين
وانا صاحبي جرجس ومتى وحننا وكلنا أخوات

☆ ☆ ☆ ☆ ☆

دكتور مسيحي فى زنايرى يداوينى
وجارى بطرس ونشأت دول مجاورينى
وف فرن عيش صاحبه مسيحي بأشترى منه
فى الشدة ما فى مسيحي ومسلم كله بيجينى

☆ ☆ ☆ ☆ ☆

فى انحراب أيام العبور كنا سوى فى الجيش
مات المسيحي مع امسلم وفرق مافيش
لما الرصاصة بتضرب ما بتسأل ذا دينه ايه
الكل مصرى ويحارب فى صفوف الجيش

☆ ☆ ☆ ☆ ☆

فى الثورة قامت فى مصر كان هلال وصليب
ماشين سوا فى المظاهرة شيخ وقس حبيب
طلع الرصاص مالانجليز والكل إستشهد
والدم ساح واختلط وف كل صدر يصيب

☆☆☆☆☆

والدين بتاع ربنا وإحنا عباد الله
ومسيحى بيقى كتابى من عباد الله
قرأنا قال دول أقرب لنا فى الناس
والحب والود بيننا ودا بيقى فضل الله

☆☆☆☆☆

ضربوا العراق

ضربوا العراق ..
من غير خناق ...
بعد السنين ..
اتلككوا ...
بئس كتيب تقرير وقال ..
مارضوش بقي يتفتشوا ...
بعد السنين سبعة تمام ..
ومفتشين بيدورا ...
فتحوا البيوت ..
هدوا السدود ...
قلبوا المكان ..
برضوا ما بان ...

ودمروا كل السلاح ...
أرض العراق أصبح مباح ...
وينقبوا أو يحرقوا ..
وسلاح كيماوى ما يتركوا ...
لكن بقى الديب والحمل ..
وحكاية كات مضرب مثل ...
قالوا المياه عكرتها ..
قالوا ابويا اللى فعل ...
برضه كلوا ودى حجتة ..
والطبخة كانت واستوت ...
ومونيكا جت واتحضرت ...
قالوا المحاكمة للرئيس ..
وبعدها حيروح قطيس ...
قال اضربوا العراق قوام ..
ضرب يكون تحت الحرام ...

كان بده يلغى محاكمته ..
لكن جبوه من قعدته ...
حكموا عليه أنه مدان ..
ضرب العراق ما فاد مدان ...
عملوا الغارات دكت بلاد ..
ماتوا الأهالي والولاد ...
وف شهر صوم هدموا البيوت ..
خلوا الوليد والشيخ يموت ...
وف شهر صوم وله جلال ..
ضربوا في يوم رصد الهلال ...
أصل الأمان حق الإنسان ..
سلبوا الأمان ضاع الإنسان ...
وإحنا العرب عايشين في حرير ..
وليل نهار نعمل فوازير ...
ومسلسلات وغنى وصفير ..
والناس هناك بتقول يا مجير ...

ويوماتى يموتوا ضحايا ..
واحننا نغنى يا هنايا ...
ولا حد فاكرا يا أخواتى ..
والدش سهرنا ليلاتى ...
ومسلسلات مالية الشاشة ..
من الف ليلة وسيرة هلالى ...
قنوات ليلاتى بتلالى ..
مع الهوانم نقضى ساعات ...
فوازير معاها رقص بنات ..
والكل سهران كده مبسوط ...
ولا فاكرا أخوه بيموت ..
طب يا عرب حتى أشجبوا ...
أو حتى ثوروا وأغضبوا ..
أو أعملوا مؤتمر القمة ...
اتلموا فيه حتى اللمة ..
قولوا تصرىحات - أو تلمىحات ...

علشان الوحدة العربية ..

تبقى كده العيشة هنية ...

☆☆☆☆☆

الحبال

أصل الحبال أنواع متوظفة دائما
فيها اللي وهمى والمعنوى وكلها قايمة
على الحقيقة والعقاب وبرضه فيها عذاب
ودى أنا حنشوف ونستعرض كده القايمة

☆☆☆☆☆

فيه حبل غالى وعظيم ودا يبقى حبل الله
لو اعتصمنا بيه احنا وعباد الله
وحده عظيمة ولا يفرقنا اى خلاف
ودى اية فى القرآن أعظم كلام الله

☆☆☆☆☆

وحبل جامد بيتلف حوالين رقبة الغاطان
واى مجرم بيقتل اخوه يفقد حياة انسان
ودا قصاص ربنا حله بيه تستقيم الناس
للمجتمع حماية ولا يبقى فيه غاطان

☆☆☆☆☆

وحبل تانى ينفرد ونحطه فى البلكون
ننشر عليه الغسيل كده ويكون
يتهى كده فى الشמוש ويبقى بينور
ويبقى حبل ضرورى للغسيل ويصون

☆☆☆☆☆

وحبل أنطه بنظام بيخفف الأوزان
تمارين سريعة وجسمى سخن وأنا حران
ورياضة تبقى جميلة ومفيدة للأجسام
ودا حبل كله فوايد وسعادة للإنسان

☆☆☆☆

وحبل موجود فى مركب يفردها قلوبها
وشراع يشده الهوا ويحكموا فروعها
يربطها عالشط ولا حركة تاخذها هناك
فى البحر يبقى ضرورى ومركبه يطوعها

☆☆☆☆

بين المحبين بيبقى فيه حبل الوداد
والزوج وزوجته ويزيده وجود أولاد
والكلمة حلوة بين الأحباب وبتقويه
والعشرة بتخليه متين وله أوتاد

☆☆☆☆

أما حبال الصبر دى تتفع مع الأيام
وضرورى تبقى صبور تهدى كده وتنام
والمولى خيصونك وحقك لم يضيع أبدا
لكن دا صبرك جميل ولا يبقى بعده كلام

☆ ☆ ☆ ☆ ☆

وحبل صرى يغذى الجنين بغذاه
وف بطن امه تسع أشهر وهو معاه
دا أصله حبل الحياة موصول كده دايمه
بعد الولادة بيستغنى كده وينساه

☆ ☆ ☆ ☆ ☆

وحبل جامد وفيه فرقتين بيشدوا بعضهم
والشاطر اللى يشده ويروح نواحيهم
وعلامه فى الوسط بتحدد مكانه فين
واللى تروح عنده يبقى هو اللى ربح فيهم

☆ ☆ ☆ ☆ ☆

وحبل أعصاب بيمشى فى ظهرنا ونخاع
جوه عمود فقرى ضرورى ويضبط الأوضاع
ينقل أوامر مخنا للجسم دوغرى بينفذ
يسرى فى جميع البدن والأمر منه مطاع

☆☆☆☆☆

حبل الجرس فى المدارس يضبط الأوقات
وبرضه تلقاه فى الكنائس ويعلن الصلوات
وحبل مربوط ورايا أشد بيه خروفي
أو فى قرون البقر وكل دا معروف

☆☆☆☆☆

نور الصباح



مشيت في وسط الغيطان بالليل سمعت الديب
عمال بيعوى بصوت عالي كده وكثيب
أنا خفت من وحدتى معرفش إيه جرائى
سمعت صوت قلبى وأنا بجري يدب يدب



عربية ضربت ولد بيعدى فى الشارع واللله
كثرت عليه ولا حد بيسأله
يجيب إنه أسعاف تشيله وتنقله بسرعه
قبل المقدر ما يحصل ويموت فدى الشارع



صاحب عمارة يبني على ف الأدوار
ترخيصه يبقى ثلاثة يطلع تسع أدوار
حديد رفيع ورمله وأسمنت كان فسدان
تلقى العمارة فى لحظة قوام كدة تنهار
☆☆☆☆☆

دكتور بياخذ فيزيته للكشف بالميات
والحجز عنده فى شهر ويوم بالوسطات
يجبى ويكتب روضة تبقى وش وظهر
والكفة تبقى كبيرة ياريتة خف ده مات
☆☆☆☆☆

فى الدنيا فيه حقيقة ثابتة هيه المسوت
ولا حد صدق وفكر انه يوم حيمسوت
عشان كده بيفترى ويبأدى كلى الناس
ولا يفتكر إن عمره بكره كله بفسوت
☆☆ ٥٢ ☆☆

على البلاج شفت طفل وطفلة ماسكين بعض
بيمشى بيها على الرملة وإيدهم شابكة فى إيدين بعض
أنا قلت شوف آدم وحوا من بداية الخلق
أهو هما كاتوا كده دلوقت يكرهوا بعض

☆☆☆☆☆

لما الزمن يجرى واثره يبقى أكيد
بيان على وشنا من كثرة التجاعيد
مهما ندارى ونصبغ فى شعرنا ويبيض
الوش يظهر مكرمش وبكره برضه يزيد

☆☆☆☆☆

نقعد نقول للشباب إن أيامنا كات أحسن
والحاجة كانت رخيصة والخلق كان أحسن
أما الحقيقة بقى أن أنا كنا فى حال
يصعب على الكافر ومش ممكن يكون أحسن

☆☆ ٥٣ ☆☆

دلوقت فيه فيديو ودش وجنيه تليفزيون
من لمسه واحدة يجيلك كل ما فى الكون
لو كان فى امريكا تقدر تعرف اللي يجرى هناك
على شاشته تظهر صور من كل صنف ولون

☆☆☆☆☆

عقدة خواجه وثبتت عند كل الناس
وقت الشرا نشتري من بره حتى مداس
وحاجة صنع بلدنا دايمًا وحشة ما تعجب
حتى ولو كانت أحسن برضه ما تسواش

☆☆☆☆☆

الآلات الموسيقية

سيد آلات موسيقية هو أصله العود
والنغمة تطلع جميلة هيه بس تسود
هوه الوحيد يتحضرن يبقى قريب م القلب
فى اللحن هوه الأساس والسلطنة للعود

☆☆☆☆☆

أما الكمان الرقيقة نغماته ربانى
تطلع تخش الدماغ حلوة وعجبانى
تلمس شغاف القلوب وتدوب بحنينة
ونجمة فى التخت على وصوته حيانى

☆☆☆☆☆

برضه القانون لما بيقسم يخلي للطرب قيمة
أنغامه تدخل لجوه القلب وعظيمة
شسرقى أصيل الحانة حلوة مالتراث
أوتساره تحيى ليالى حلوة وجميلة

☆☆☆☆☆

والناى يا روحى عليه دايمًا حزين مهموم
نغماته تطلع تقطع فى القلوب وتزوم
والدمعة تنزل على الخدين وهم كبير
لكنه يغسل هموم العاشق المحروم

☆☆☆☆☆

لكن الموسيقى دى دايمًا تنضبط بايقاع
والطبلية دى ستها والا تبقى مشاع
تمسك لها الواحدة وتفتح كل مداخلها
ومن هنا بيتدى يتحقق الإبداع

☆☆☆☆☆

ولا ننسى يوم الجيتار ولا حتى أنغامه
والأورج كالبدن نوره وهو بيدي الحانه
ويقسم المواويل وهو غربي مش شرقي
لكن بقي العزف ينشر كل حركاته

☆☆☆☆☆

رباعيات



لجل الفلوس الناس بنقسي وترتكب كل الذنوب
والأخ يقتل برضه أخوه ويطلعوا كل العيوب
والناس بتتنسى إننا مسيرنا جميعنا للزوال
داحتي في الموت الكفن دايم يكون من غير جيوب

☆☆☆☆☆

بعت إبني المدرسة يدرس ويتعلم
وف كل يوم لما يرجع ألقاه كده مبلم
وأدفع فلوس للمدرسة علشان تقيم بنايات
وإبني مخه وقف ولا عمره يتعلم



أبص للشباع والآقى إن له رصيفين
مخصوص لكل الخلايق يمشوا عالجانين
لكل بقى العربيات مترصصة فوقهم
والناس بتمشى حيارى مش على الرصيفين



وقفت يوم فى الصباح أغسل أسناني
لقيتها حلوة ومصفوفة واحدة وزا التانى
ضحكت من كل قلبى وأنا واقف أشاهدها
أتارينى بدعك فى ضبة مش فى أسناني



ساعات بأمسك قلم وأحاول أكتب شعر
والوزن بقى ينكسر والشعر يطلع نثر
والقافية تهرب وأحاول أجيبها ما ترجع
الشعر دا موهبة مش كله كذب وفشر

☆☆☆☆☆

أيام شبانى أنا لفيت ودرت كثير
والسمكة قطعت ديلها بس سبته قصير
والبيضة ويا الحجر دى أعز العايى
دلوقت صابنى العجز باكل على الضراير

☆☆☆☆☆

نمسك فى إيد الزمن ونشد عالآخر
ونقوله هدى شوية دا العمر متأخر
وإحنا بنكبر ونكبر مع كل يوم بيوفوت
وشبابنا راح ينسحب منا على الآخر

☆☆☆☆☆

ياقلبي أصفى وأغفر ونظم كل دقائقك
وإنسى ماضى اليم وإبدأ بقى حياتك
دا كل شئ بيهون فى الزمن إلا كرامتك
ومية الوجه تبقى دى أحلى سماتك
☆☆☆☆☆

نفضل نقول إن الحب أحلى حياة
لكن دا كله عذاب وإحنا بنستحلاه
ألم ووصل وفراق والهجر فى الآخر
لكن له لذة عجيبة والكل يمتناه
☆☆☆☆☆

لما عظيم بيموت الناس تزعل وتتألم
ويعملوا حفلة كبيرة والكل يتكلم
كلام كتير يقال ويقولوا كل حسنة
والذكرى تفضل جميلة والموت دا بيعلم
☆☆☆☆☆
٦٠

الناس كلامها كثير جايب فلوسه منين
من كام سنة كان فقير سالف وقبة دين
مرتبه مالوظيفة يدوب يكيفه أكل
لازم ضرورى ارتشى هلب له كده قرشين

☆☆☆☆☆

دا الكون بيبقى جميل لما الربيع بيهل
تلقى الجنائن بتطرح كل ورد وفل
والزهر يملأ الوجود ببقى الشجر ألوان
تلقى الحياة متفتحة برضه الجمال بيطل

☆☆☆☆☆

فى الدنيا فى ناس راكبة وناس ماشية لكن أدوار
فى يوم تلاقى دا راكب صبح ماشى فى نص نهار
ودا ماشى بقى راكب عشان الدور بقى دوره
وهيه دنيا دوارة وبعد الليل بيحى نهار

☆☆☆☆☆

ونص الناس بتتكلم وباقي الناس يكون شغال
وعمر اللي بيتكلم ما يقدر يوم يكون شغال
لأن الشغل دا عايز رجال ما يضيعوش الوقت
هيشغلوا عمل صامت ولا كلمة فى يوم تنقال

☆☆☆☆☆

الأرض دى زى كورة فى الفضاء بتدور
والدورة دى تتعمل فى يوم ومش فى شهور
والليل بييجى والنهار يجرى وبعده الليل
والعمر يجرى ورا بعضه شهور وشهور

☆☆☆☆☆

والميه تتبخر من البحر وتبقى سحاب
ترجع وتنزل مطر عالارض بعد ضباب
تروى الأراضى وتتصفى بقى فى الجوف
تتلم فى الأنهار وترجع تانى تبقى سحاب

☆☆☆☆☆

فيه ناس تقول إن الحب كله عذاب
وناس تقول إن اللي قال كده كذاب
والحب أصله جميل وأحلى منه مافيش
وإحنا بنصدق كل اللي يقولوه الأحباب

☆ ☆ ☆ ☆ ☆

النحلة لو تعمل عسل تفضل تدور وتدور
من زهرة إلى زهرة تتقل لقاح وبذور
تعمل مشاوير كثيرة كله رايح جاى
تنتج وتعمل عسل حتى يزوح النور

☆ ☆ ☆ ☆ ☆

أحفادى حولى يزورونى عندنا فى البيت
هشام ونسورا حبايى نورولى البيت
صدق اللي قال اعز الولد ولد الولد
دول حنة منى ولا أشعر بأنى فنيت

☆ ☆ ☆ ☆ ☆
٦٣

أنام وأحلم وأحقق كل اللي أتمناه
ومهما كان مستحيل يسهل وأنا جواه
وأحس إنى سعيد راضى كده فرحان
ولما يجيى الصبح أفضل على ذكره

☆☆☆☆☆

البنيت كبرت وفازت وخرط البنيت جالها
قعد بيخرط جمالها وسوى كل أحوالها
والقد مياس وفاتن والشيطان حواليه
عمال بيغرى الناس تبص لجمالها

☆☆☆☆☆

البنيت قالت لأبوها يابا هاتلى عريس
يكون شباب وغنى ما يكونش بس تعيس
وبشغل فى الخليج وشقته جاهزة
وفلوسه مالية جيوبه يبقى أحلى عريس

مش عايزة واحد فقير أتعب وأبنى معاه
فى سلم الفقر يصعد درجة وأنا وإياه
والعز برضه جميل والفلس هايله
وبسرعة دور عليه وارجع لى وانت معاه

☆ ☆ ☆ ☆ ☆

أنا لما أقول إن المال دا مالى أكون غلطان
دا ربى حرسنى عليه ومالى عليه سلطان
يفضل معايا لحد ما أسلمه لغيرى
وحسابى يبقى عسير لو كنت يوم غلطان

والصدقة تعمل زيادة فى المال ولا ينقص
أما الزكاه دى واجبة وبرضه ما ينقص
تحسن على الفقراء وتعمل خير فى دنياك
والخير فى عملك دا دايم والمال لا ينقص

☆ ☆ ٦٥ ☆ ☆

الرزق متوزع على الكون وربك ما بينسى حد
ومهما كان العدد ما يحصل غلط فى العدد
متقسمة أنصبة مكتوبة فى لوح محفوظ
ولا حد يقدر فى يوم يلعب فى رزق حد

☆☆☆☆☆

الناس معادن وكل معدن له صفة وخصوص
منهم معادن نظيفة من ذهب وفصوص
وبرضه تلقى النحاس والرصاص دولا بيصدوا
ولما تبقى تعاشرهم يظهر المدسوس

☆☆☆☆☆

الخمرة تذهب بكل العقل والإحساس
وشاربها يفقد حماسه للعمل والناس
ويقول لنفسه أصل الدين مش محرّمها
دا الدين يحرم كل ما يغيب الإحساس

☆☆☆☆☆

فِي بِلَادِنَا فِيهِ صَحْرَا وَاسِعَةٌ كَبِيرَةٌ وَرِضِيَّةٌ
وَلَمَّا نَنُوءِ الْبِنَا نَبْنِي قَى اَرْضِ زَرَاعِيَّةٍ
نَفْضَلْ نَبُورَهَا وَنَبْنِي عَلَيْهَا الْبِنَا كُلَّهُ
وَنَجْرِى عَالِصَحْرَا نَصْلَحْ وَنَعْمَلْ اَرْضِ زَرَاعِيَّةٍ



الصامولة والمسمار

بصامولة مع مسمار	تركب فى عربية تلقى
أنا عقلى والله احتار	الكرسى مربوط وتبقى
ابص حولى القاهم	فالقاعدة تمسك تمام
فى كل شئ مسمار	بصمولة مع مسمار
☆☆☆	☆☆☆

فيه طيارات	أركب اسانسير عمارة
فى الجو عاملة صفير	يطلع بقوة وإدارة
وجناحها مربوط قوى	وسلكة مربوط كويس
بصمولة مع مسمار	بصمولة مع مسمار
☆☆☆	☆☆☆

نضارة على وشى راكبة
أيديها شايلاها راكنة
متحملة فوق ودانى
بصمولة مع مسمار

☆☆☆

☆☆☆

دكتور يداوى السنان
ويصحى كام عيان
أدواته تلقاها ماسكة
بصمولة مع مسمار

☆☆☆

☆☆☆

ومحطة تنتج كهربا
غلاية ضخمة مركبة
وموتور يدور ببقى البخار
مبنى بصمولة مع مسمار

☆☆☆

☆☆☆

يزرع سنان ثابتة	ولكل شئ مسمار
فى الفك كده ماسكة	تزنق صامولة عليه
وسنانه مزروعة	عشان عمار الكون
بصمولة مع مسمار	والأض ماشية عليه
☆☆☆	☆☆☆
والكوبرى صامد تمام	والقطر سكة حديد
وحديده شايك قوام	قضييه برضه حديد
والناس يعدو عليه	وصلاته ماسكة وجامدة
بصمولة مع مسمار	بصمولة مع مسمار
☆☆☆	☆☆☆
حتى كمان بوتاجاز	ومراكب البحر سايرة
مضمونه وبابه قزاز	ومكنة جواه دايرة
وفرنه بابه حديد	ألواحها جامدة حديد
مربوط بكام مسمار	بصمولة مع مسمار
☆☆☆	☆☆☆

مدفع بيطلق بسرعة
بنار كبيرة ما ترعى
وصلاته مربوطة دائما
بضمولة مع مسمار

☆☆☆

☆☆☆

صاروخ وطاير ل فوق
وفى الفضاء مطلق
يوصل لحد القمر
بضمولة مع مسمار

☆☆☆

☆☆☆

وونش جامد مفترى
يشيل حمولة ماتقدرى
عشرات من الفتية ورجال
أسلاكه ماسكة بمسمار

☆☆☆

☆☆☆

ولكل مسمار صامولة
معمولة قدده عمولة
تركب عليه وتليق
ترنق قوى بالصامولة

☆☆☆

☆☆☆

رجل وفيها كسور
فيها الحديد منشور
بيثبتوا المفصل
بصمولة مع مسمار

ولكل مسمار صامولة
معمولة قدده عمولة
تركب عليه وتليق
ترنق قوى بالصامولة

ولكل مسمار صامولة
معمولة قدده عمولة
تركب عليه وتليق
ترنق قوى بالصامولة

العدد سبعة

لفت نظري وأنا بقرا عدد مشهور رقم سبعة
دا ربك خلقه فى السموات خلقها كلها سبعة
وحتى شفت الأسبوع لقيته برضه من سبعة
والوان زاهية موجودة فى شكل الطيف عدد سبعة
وحتى حروف فى موسيقى فى ترتيبها تكون سبعة
ومولود يتولد ويعيش وعمره يكون شهر سبعة
وحتى الأبجدية رؤوسها من رقم سبعة
وبرضه فى حج نبقى نطوف نلف فى الحرم سبعة
وفى الموال نجيب سيرة سواقى وتكون سبعة

وحتى القطة أرواحها سألت الناس قالوا سبعة
ودنيتنا فيها عجائب تعدوهم تقول سبعة
ونسعى بين صفا ومروة وأشواطنا تكون سبعة

وفى القرآن سنين وعجاب ويوسف عدها سبعة
وحسنة تكون وعند الله سنابل عدها سبعة
وتغلب لما شافوا ديله ولفاته بقت سبعة
وحتى الدوخة بندوخها ولو سألوا نقول سبعة
وطفل وليدوفى الغربال يدقوا الهون فى يوم سبعة
وعسكر جيش فى وقفهم دى رجليهم تكون سبعة
نخطى لما نتبخر فى بيتنا نعد نقول كمان سبعة
وأسد السيرك ومراته ينادوها مدام سبعة
ولما نصر يتحقق صوابنا تكون سبعة
وأرض كبيرة مخلوقة عدد طبقاتها من سبعة
وحتى رسولنا قد وصى أكيد عالجيران سبعة
وفى السجود للأرض تلمس جسمنا فى سبعة
وحتى رسولنا الهادى دا خلف م الولاد سبعة
وفى فاتحة القرآن برضه تلقى المثنى سبعة
وبرضه علاوة بتجيلنا تبشرنا فى واحد سبعة

☆ ☆ ٧٤ ☆ ☆

النفاق



أنا مبدأى فى الحياة إنى ما طاطى لحد
ورأس مرفوعة دايمًا مهما كان الحد
فى الحق ما عرف أخويا عنه ما أقدر أحيد
مهما تكون النتيجة ومهما كان يحتد

☆☆☆☆☆

عشان كده فى التراقى لم يكون لى نصيب
وإن شفت بين رؤسائى ما تلاقبلى حبيب
لأنى فى الحق دغرى عنه ما أقدر أميل
ولا فيه مجاملة لرئيسى وعمرى ما بقى قريب

☆☆☆☆☆

اما اللى واصل والمنافق دول بيعلوا قوام
يدخل يصبح عالمدير يفضل يقول فى كلام

ويقول وشك منور واحنا تلاميذك
وبتوجيهاتك دا كل الشغل ماشى تمام

☆☆☆☆☆

تلقى فى كشف الحوافز اسمه فى الاول
والترقية خدها بسرعة كان فى عام نول
كشف الغياب يترفع اسمه دا مهما غاب
لأنه يخدم فى بيت المدير وعمره ما حول

☆☆☆☆☆

أما تقارير السر برضه تكتب على طول
بيأخذو هما امتياز وأنا أكون مقبول
مع إنى أنا بأشتغل وها بينافقوا
لكن بقى العمل مش هوه دا المأمول

☆ ☆ ☆ ☆ ☆

بس ضميرى يقول إن الحال دا مش دايم
ويكره بيتجى مدير ضميره صاحى مش نايم
ببدى الحقوق كلها لكى يكون شغال
ولا مفيش نفاق أو تراقى للى يكون نايم

☆ ☆ ☆ ☆ ☆

قطار العمر



قطار العمر ماشى وكل الناس كده راكباه
يقف فى محطة ومحطة تبقى الناس عليه ومعاه
لكن بييجى فى محطة وينزل من عليه الدور
ويمشى القطر فى طريقه وباقى الناس تكون وياه

☆☆☆☆☆

وعمرى محدده الخلاق بساعة وثانية ودقيقة
لا أقدم يوم ولا آخر ودا اللى بيجرى وحقيقة
لا حد يطوله ثانية ولا آخر دا يوم مشهود
وكله فى وقته وساعاته ولا يبقى كده دقيقة

☆☆☆☆☆

ومالى كله راح أسيبه وأولادى حفوتهم قهر
وعملى هو رح ينزل يجاورنى هنا فى القبر
وهو إن كان عمل صالح حيسعدنى أنا وأرتاح
وأما أن كان عمل طالح حيبقى كله منى راح
☆ ☆ ☆ ☆ ☆

ولما ربى يسانى عملت ايه فى دنياك
نعمت عليك بكل الخير وايه كانت حكاياتك
صلاتك فىن صيامك فىن زكاتك فىن وحج البيت
أرد وأقول أدى عملى وأدى شكرى لنعماتك
☆ ☆ ☆ ☆ ☆

وأخاف من يوم حسابي عسير ورحمته تشملي
وإيه يجرى وإيه ذنبي وبرضه ربي حذرني
وقال أتبع لقرآني وسنة من أعز حبيب
ودا يبقى عمل دنيا وبعده برضه حتجيلي

☆☆☆☆☆

وعمرى أيامه معدودة ولا أعرف لإمتي يدوم
فلا أفضل أجل يوم عمل صالح يكون معلوم
وأعمل فيه لآخرتي كأنه بكرة كان يومى
وبرضه فيه لدنياي عمل وأتمه يوم عن يوم

☆☆☆☆☆

زوجتي

ثلاثين سنه وعشره وانا عايش مع زوجتى
مروا كما ساعات وثوانى وانا بروضه مع حبيبتى
ولا يوم فاتتى ودائما فى الهنا والضر
وكل يوم يزيد حبى لها حتى وانا فى شبتى

☆ ☆ ☆ ☆ ☆

مراتى احدى خليله نورت لى الكون
عاشت معايا سنين وعمرها ما تخون
على الحلوه والمره معايا ولا اشتكتنى فى يوم
ولسرى كاتميه ولا باحت دا مهما يكون

☆ ☆ ☆ ☆ ☆

ربت عيالى بهمه واتخرجوا شهادات
تعبت معاها سنين صبيان وبنات
شالت همومهم وانا مسافر ومش موجود

كأت أم صادقہ متحملہ كلہ دا فى سكأت

☆ ☆ ☆ ☆ ☆

ولما ربك فرجها وسافرنا عالدمام

بعد المعاش ما تقدر مش ممكن أقدر انام

ورحت وحدى وسبت مراتى وحديها

تكمّل رسالتها لحد ما توصل وتبقى تمام

☆ ☆ ☆ ☆ ☆

كانت تجينى فى الاجازات تهنينى

وبكل شوق تسعدنى وترضينى

تراعى أهلى وتدى حنان وتسقينى

ترجع تراعى الولاد وتسبى لحنينى

☆ ☆ ☆ ☆ ☆

وبعد ما رجعنا وكانت خلصت الاشغال

فضلت بقى على الوفا رغم نقص المال

والحب هوه دا برضه زاد عن الاول
والشكر كله لربى زوجتى بنت حلال

☆☆☆☆☆

تبقى دى هيا السعادة

السعادة هيا ايه ياناس قولولى
ايه سببها منين اجيبها
هيه تبقى فى مال كثير
واللا قلب وخير وفير
واللا هوه فى الجمال
واللا كثرة العيال
واللا صحه تكون حديد
٨٣

واللا حب يكون حديد

واللاهيه فى القناعة

واللا كتره فى البضاعة

واللا فى العشرة الجميلة

واللا عزوه وكتر عيله

واللا فى الصوم والعباده

واللاهيه تبقى عادة

لما بالننا يروق تمام

لما يجيى النوم قوام

تبقى ده هيا السعاده

هيه نسبه مش زياده

كل واحد لم مشاكله

معموله على اد شكله

يعنى تبقى خصوصى هيه

كل واحد له رزیه

والهموم متوزعه

دى كتير متفرعه

ادى مال - ادى برضه العيال

ادى صحه - ادى حكمه فى المجال

ادى غيرهم القناعه - يرضو بيها

ادى غيرهم الشجاعه - يمشوا بيها

يعنى قسم واحنا نرضى

ربنا هو المعين

بس انت قول أمين

☆☆☆☆☆

بسم الله الرحمن الرحيم

مصر العزيزة

يا مصر انتى فوق الجميع

اللى عصى واللى يطيع

حضنك كبير - سرك فى بير

وقت النضال احنا هنا

والرجال يوم المنى

ولمصر لازم نفتدى

اروحانا ليها والدماء

وكل مصرى يستعد

حتى لو كان مستبد

كله اتتسى

ولانفتكر الا امانا

روحنا وحياتنا كلنا

هيه الحنان هيه الامل
حتى لو راح الاجل
واحنا هنا - حاضرين
روحنا فدا - بايعين
نتقدموا كل الصفوف
بص وشوف
لاتلاقى واحد يعتذر
لو كان مريض
دغري يقوم - يلبس هدوم
على الجبهه يجري لو يفوت
اهله واولاده
حتى ولو كان يموت
كله فدا بلاده

يَهْجُم بِصَدْرِهِ عِـدُو

طَالِبُ شَهَادَةٍ

يَأْخُذُ رِصَاصَهُ مِـدُو

أَوْ كَانَ زِيَادَهُ

وَالْمَوْتُ يَجِيْلُهُ بِالرِّضَا

وَيَرْوَحُ فِدَا - مِصْرَ الْعَزِيْزَةِ أَمْنَا

☆ ☆ ☆ ☆ ☆

بِسْمِ اللَّهِ الرَّحْمَنِ الرَّحِيمِ

الحمد لله رب العالمين

والصلاة والسلام على من لا نبي بعده

وبعد فقد حضر في

الجلسة

التي أقيمت في

الـ ٨٨

٧٧٨

صورة الزفاف

بصيت على المكتب

لقيت صورة زفاف

اثنين شباب

واقفين سوا

وفي العنين نظرة امل

الحب فيها مكتمل

السن كات لسه يادوب

عتبة شباب

واللبس شيك

فستانها ابيض لونه فل

وتاج جميل على شعرها

وف خصرها

مربوط حزام مشدود تمام

حاکم علی الوسط النحیل

وبوکیه جمیل

ماسکاه فی ایدها جنبها

اما العریس دا کان وجیه

مالوش شبیه

اسمر طویل

مالوش مثیل

وبدله سوده کات بدیل

کانت فراك

قمیصها ابیض بالانشا

وبصدر دانتیلا

بییونه سوده ملمعه

ماسکه علی رقبته

وف وسطها دبوس جمیل

كانت المهمة نظرتة
لعروسته كانت نظرة غزل
وأمل كبير
فى الدنيا لسه حيدخلوا
مهما العوالم طنبلوا
كانوا مسيرهم يخلصوا
رقاصه تبقى تزفهم
وولاد صغار ويا بنات
ماسكين فى ديلها بيرفعوا
م الارض كان توب الزفاف
لايطول تراب
ويوسخه
ويضيع بياضه وينطفئ
والزفة كانت وانتهت

دخلوا اودتهم واختلوا

وبدوا حياتهم منها

فى اللحظة دى

بصيت لقيت صورة الزفاف

وبسرعه مرت ذكريات

وده كله فات

وف لحظه تبقى صغيره

لكن ان انا

كده افكر ان الزفاف

كان البدايه

اللى ابتدت منها الحياه

☆☆☆☆☆

الرياضة في المدارس

الرياضة كانت زمان
كل حظه بتلاقيهما
في المدارس يلعبوهما
في الشوارع برضه فيها



في المدارس كان فيه حوش
والحصص مخصص رياضه
والفرق في كل حوش
كوره باسكيت قول زياده



نلقى فيه تمارين لياقه
يلعبوا العاب قويه

ففى الطابور يجـروا تمام
كل أجسامهم سـويـه

☆ ☆ ☆ ☆ ☆

لعـب سـويـدى تـلاقـى

والنشـاط مـوجـود كـمـان

تلقـى دورى فـى المـدارس

كـل شـئ فـيـهـا بـأمان

☆ ☆ ☆ ☆ ☆

كان فـى دورى فـى المنـاطق

كـل لعبـه بـيلعبـوها

فـى البـلد تلقـى بـراعـم

فـيـه مـهاره أتقنـوها

☆ ☆ ☆ ☆ ☆

كل ابطالنا في صغرهـم
لعبوا برضه في المدارس
كل مهارتهم خدوها
في الصغر مع كل دارس
☆☆☆☆☆

أما دلوقتي في زماننا
في العدد زايد كتير
بينوا في الحوش الفصول
تكفي للجمع الغفير
☆☆☆☆☆

ففى الرياضه واحد فـ
وفى حصصها قالوا راجعوا
الدروس تبقى مهمه
للرياضه يوم راجعوا

☆ ☆ ☆ ☆ ☆

ففى النهايه بدي أقول
للرياضه مات هـ
تبقى أجسام الولاد
يلعبوها فى كل حوش

☆ ☆ ☆ ☆ ☆

أمثال

كل البنات زى بعض بس هو اللبس
أصل المثل بيقول البوصلة تبقى عروسه لو تلبس

أوعى تفكر إن البنت الشيك يبقى أصلها عالى
لازم تدقق وتدرس أخلاقها قبل اللبس

☆☆☆☆☆

أهمال

لوكل واحد يغيب ويخلف وعدنا وياه

قوام يقولوا إن الغايب حجه دى معاه

تلقى غايبه دا أهمال أو سبب تافسه

لكن المثل نستعمله فى كل وقت معاه

☆☆☆☆☆

أمثال

قبل ما تخطب عروسه أسأل على أمها
والقدره لو تتكفى البنت تطلع لأمها

البنت شاربه من طباعها وبرضه لاتنسى
فى يوم من الايام اكثر طباع أمها

☆ ☆ ☆ ☆ ☆

أمثال

قالوا فى المثل ان الميه ما تجرى فى العالى
وفى توشكا جابوا ظلمبات وحتجى طوالى

والعلم اتقدم وكل حاجاته مدروسه
وبكره توشكى تخضر وتبقى مصر فى العالى

☆ ☆ ☆ ☆ ☆

نبذة عن المؤلف

يقدمها الشاعر السيد محمد الخشاب

رئيس النشاط الثقافي بالنادى المصرى الاسكندري

◀ عندما نتحدث عن

الشاعر جابر بنهاوى

الشهير بجابر البنهاوى - فإننا نتحدث

عن أديب له فكر بعيد المدى وله من

الخيال ما يجعلك تسبح فى عالم الابداع .

◀ **جابر البنهاوى** من مواليد الاسكندرية

عضو بجماعة الادب العربى وعضو

جماعة أدباء الشعب وعضو باللجنة

الثقافية بالنادى المصرى وعضو نادى

الادب بقصر ثقافة بولكللى .

◀ نشر له الكثير بالصحف والمجلات

◀ وفاز بالعديد من الشهادات التقديرية

فى المسابقات والمهرجانات الادبية وغير

كل هذا فهو مرح ومتسامح يحب الفن
والفنانين وهو من رواد قصور الثقافة .
◀ مواظب على حضور
معظم الندوات والامسيات .
◀ هذا هو ..

الشاعر / جابر ياقوت البنهاوي

حقوق الطبع محفوظة للمؤلف
بكل وسائل النشر
فى دار الكتب والوثائق القومية
رقم الإيداع / ١٩٩٩/٩٠٠٦
التفقيم الدولى X-9137-19-977
(نور الصباح)

للشاعر / جابر ياقوت البنهاوى

قريبا جدا ..

حلول الوقت الحاضر

